

五二、天女本以蓮華供養迦葉佛塔緣

爾時復有一天女。頭上華鬘。光明晃曜。共諸天眾。來集善法堂上。時諸天眾。見是天女。生希有心。時天帝釋。以偈問曰

汝昔作何福 身如真金聚 光色如蓮花 而有大威德
身出微妙光 面如開敷花 光明甚煒燁 以何業行得
唯願為我說

天女即便說偈答言

我昔以蓮花 供養迦葉塔 今日值世尊 得是勝功德
生處於天上 得是金色報
釋提桓因重以偈讚

甚奇功德田 滅除諸穢惡 殖因者甚少 獲得勝果報

誰不樂供養 恭敬真金聚 誰不供養佛 上妙勝福田

目廣脩而長 其喻青蓮華 汝昔能興供 第一最勝尊

作妙福德業 獲得如此報

爾時天女。即從天下。執持華蓋。來到佛所。聽佛說法。得法眼淨。還於天上。時諸比丘。即問佛言。此女往昔。作何行業。得報如是。佛言過去之時。以妙蓮華。供養迦葉佛塔。故獲勝果。今見道跡也。

五三、天女受持八戒齋生天緣

爾時復有一天女。受持八戒。生於天上。得端政報。光顏威相。與眾超異。時共諸天。集善法堂上。諸天見已。生希有心。釋提桓因。以偈而問

汝昔作何業 身如真金山 光顏甚煒燁 色如淨蓮花

得是勝威德 身出大妙光 以何業行獲 願為我說之